

DOMENIE XXI «VIE PAL AN»

Antifone di jentrade cf. Sal 85,1-3

Slungje la tô orele, Signôr, e rispuindimi:
gno Diu, salve il to famei che in te al spere;
ve dûl di me, Signôr,
che o ài berlât viers di te dute la zornade.

Colete

Diu, che tu unissis tun sôl volê i cûrs dai tiei fedêi,
dàur ai tiei popui di volê ben a ce che tu comandis
e di bramâ ce che tu desideris
par che, framieç dai savoltaments di chest mont,
i nestris cûrs a sedin pontâts là che e je la vere gjonde.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Is 66,18b-21

A tornaran a menâ dongje ducj i vuestris fradis di ducj i forescj.

Dal libri dal profete Isaie

Cussì al dîs il Signôr: «O vignarai a tirâ dongje ducj i forescj e dutis lis lengthis; lôr a vignaran e a viodaran la mê glorie. Ur darai un segnâl e o mandarai cualchidun dai lôr, che a son restâts, de bande dai forescj, de bande des isulis lontanis che no àn sintût a fevelâ de mê innomine e che no àn viodude la mê glorie; lôr a contaran la mê glorie framieç dai forescj. A tornaran a menâ dongje ducj i vuestris fradis di ducj i forescj come ufierte al Signôr sun cjawai, sun cjars, sun puartantinis, sui mui e sui dromedaris, te mê sante mont di Jerusalem, al dîs il Signôr, come che i fîs di Israel a puartin l'ufierte in vâs monts tal templi dal Signôr. Ancje framieç di lôr mi cjolarai predis e levits». Peraule di Diu.

SALM RESPONSORIÂL dal Salm 116

R. Ti adoraran, Signôr, ducj i popui de tiere.

Laudait il Signôr, ducj vualtris popui,
ducj vualtris, forescj, cjantait la sô glorie. R.

Al è stât grant par nô il so boncûr
e la fedeltât dal Signôr e dure par simpri. R.

SECONDE LETURE Eb 12,5-7.11-13

Il Signôr al corêç chel che i sta a cûr.

De letare ai Ebreus

Fradis, o vês za dismenteade la racomandazion che us è stade fate tant che a fîs: fi gno, no sta spreseâ la corezion dal Signôr e no sta butâti jù cuant che lui ti corêç; parcè che il Signôr al corêç chel che i sta a cûr e al cjastie chel che lu ten in cont di fi.

Al è pe vuestre corezion che o patîs! Diu us trate come fîs; e cuâl isal chel fi che il pari no i fâs une corezion? Sigûr che ogni corezion, sul at, no nus dà ligrie ma displasê; dopo però e bute pâs e justizie a di chei che e à indreçâts.

Pa la cuâl, tirait sù lis vuestris mans che a pendolin e i zenoi clopadic e dreçait i trois stuarts pai vuestris pas, par che il pît clopadic nol vedi di strupiâsi, ma anzit di comedâsi.

Peraule di Diu.

CJANT AL VANZELI cf. Lc 13,29

R. Aleluia, aleluia.

Ducj i popui, di soreli jevât a soreli a mont,
a cjaparan part tal gustâ dal ream di Diu.

R. Aleluia.

VANZELI Lc 13,22-30

A vignaran di soreli jevât e de tramontane e ducj a varan part tal gustâ dal ream di Diu.

Dal vanzeli seont Luche

In chê volte, Jesù al passave par citâts e par borcs insegnant e intant al leve viers di Jerusalem. Un i domandà: «Signôr, sono pôcs chei che si salvin?». I rispuindè: «Metêtele dute par jentrâ pe puarte strete, parcè che us garantîs che une vore di lôr a ciraran di jentrâ ma no rivaran. Dopo che il paron di cjase al sarà jevât sù e al varà inclostrade la puarte, vualtris o scomençarês a restâ difûr e a tucâ te puarte disint: Signôr, vierzinus. Ma lui us rispuindarà: No us cognòs; no sai di dulà che o vignîs.

Alore o scomençarês a dî: O vin mangjât e bevût denant di te, e tu tu sêss passât insegnant pai nestris borcs. Tal ultin lui us disarà: Jo no sai di dulà che o sêss. Slontanaitsi di me, ducj vualtris che o fasê dome mât! Li o ciularês e o patissarês un grum cuant che o viodarê Abram, Isac e Jacop e ducj i profetis tal ream di Diu, e vualtris difûr. A vignaran di soreli jevât e di soreli a mont, de tramontane e dal misdî e ducj a varan part tal gustâ dal ream di Diu. E ve che un pôcs di chei che cumò a son fra i ultins a saran i prins, biel che altris di lôr che cumò a son i prins a saran i ultins».

Peraule dal Signôr.

Su lis ufiertis

Signôr, che cuntune sole vitime,
ufierte une volte sole,
tu ti sêss cuistât un popul di fîs,
danus, inte tô Glesie, la gracie de unitât e de pâs.
Par Crist nestri Signôr.

Antifone a la comunion cf. Sal 103,13-15

Cul prodot des tôs voris tu passis la tiere, Signôr,
par tirâ fûr il pan de tiere e il vin che al indalegri il cûr dal om.

Daspò de comunion

La midisine dal to boncûr, Signôr,
che e operi ad implen dentri di nô
e judinus e rifinissinus
in mût di fâti content in ogni nestre vore.
Par Crist nestri Signôr.